

南無華嚴會上佛菩薩（三稱）

大方廣佛華嚴經入不思議解脫境界普賢行願品卷第十五

爾時，善財童子，於諸眾生，起大慈普徧心，起大悲潤澤心。思惟相續曾無間斷，福德智慧具足莊嚴，正見圓滿，離諸塵垢，證法平等心無高下，隨順悟入一切智道，拔不善刺，滅一切障，了達甚深覺法自性。堅固精進以為牆塹，不思議三昧而為園苑，以慧日光破無明闇，以方便風開智慧華，以廣大願充滿法界，心常現入一切智城。如是勤求菩薩之道，漸次往詣樂瓔珞城，到彼詢求最勝長者。見在城東大莊嚴幢無憂林中，無量商人，百千長者，眾所圍繞，理斷人間種種事務。因為宣揚出世之法，令離見慢及我、我所，捨所積聚眷屬珍財，滅除慳嫉，一切疑執，心得清淨，無諸穢濁，獲淨信力，常樂見佛，受持佛法，生菩薩力，起菩薩行，入菩薩三昧，得菩薩智慧，住菩薩正念，增菩薩樂欲，發起無上菩提之心。

爾時，善財即至其所，以身投地，頂禮其足，良久乃起。以尊重心，白言：「聖者！我是善財！我是善財！我專尋求菩薩勝行。菩薩云何學菩薩行？菩薩云何修菩薩道？隨修學時，常能化度一切眾生；常能現見一切諸佛；常得聽聞一切佛法；常能住持一切佛法；常能趣入一切法門，入一切剎，學菩薩行；常能久住一切大劫，修菩薩道心無厭足；能知一切如來神力；能得一切如來護念；能入一切如來智慧。」

時，彼長者告善財言：「善哉！善哉！善男子！汝已能發阿耨多羅三藐三菩提心。善男子！我已成就：至一切處淨菩薩行法門，無體、無依、無作、無住，神通之力。善男子！云何名為：至一切處淨菩薩行法門？

善男子！我於此三千大千世界，欲界一切諸眾生中。所謂：一切三十三天、一切須夜摩天、一切兜率陀天、一切樂變化天、一切他化自在天、一切魔天，及餘一切欲界所居，部類眷屬，一切天、龍、夜叉、羅剎、鳩槃荼、乾闥婆、阿修羅、迦樓羅、緊那羅、摩睺羅伽、人與非人，村營城邑，一切住處，諸眾生中，隨其所應而為說法。令捨非法，令息諍論，令除鬪戰，令止忿競，令破怨結，令解繫縛，令出牢獄，令免怖畏，令斷殺生，乃至邪見，一切惡業不可作事，皆令禁止。令其順行一切善法，諸可作事，皆使正修；令其徧學一切技藝，於諸世間而作利益；為其分別種種諸論，隨其所應，令生歡喜，令漸成熟；隨順一切諸外道眾，為說勝慧，令斷諸見，令入佛法；乃至色界一切梵天，我亦為其說如是法。如於此三千大千世界，乃至十方十不可說，百千億那由他佛剎極微塵數世界之中，我皆為其廣說正法。所謂佛法、菩薩法、聲聞法、獨覺法；說地獄趣，說地獄眾生受苦差別，說向地獄道；說畜生趣，說畜生眾生受苦差別，說向畜生道；說閻羅王界，說閻羅王界受苦差別，說向閻羅王界道；

說天世間，說天世間受樂差別，說向天世間道；說人世間，說人世間受苦受樂，說向人世間道。

善男子！我說如是種種世間，若集、若壞、若染、若淨。為欲開顯菩薩功德，為令捨離生死過患，為令知見諸佛功德，為令知見諸有趣生，為令知見無障礙法，為令開發智慧光明，為欲顯示苦樂因起，為欲顯示入無相門，為令眾生捨諸想著，為令證得佛無依法，為令永滅煩惱業輪，為令能轉佛淨法輪，我為眾生說如是法。

善男子！我唯知此：至一切處淨菩薩行莊嚴法門，無依、無作、無性、無住神通之力。如諸菩薩摩訶薩，具足一切自在神通，悉能徧往一切佛刹，得普眼地，住淨耳根，悉聞一切音聲言說，普入諸法，智慧自在，勇健無比，離諸乖諍，以廣長舌出平等音，其身妙好同諸菩薩，與諸如來究竟無二，智身廣大，普入三世境界無際，同於虛空。而我云何能知、能說彼功德行？善男子！於此南方有一國土，名：無邊際河，其國有城，名：羯陵迦林，有比丘尼，名：師子鬘申。汝詣彼問，菩薩云何學菩薩行、修菩薩道。」

時，善財童子，禮最勝足，繞無數匝，殷勤瞻仰，一心戀慕，辭退而去。爾時，善財童子漸漸前行，至無邊際河羯陵迦林，周徧尋訪師子鬘申比丘尼；時，無量人咸告之言：「善

男子！此比丘尼，在勝光王之所捨施，日光園中，說法利益無量眾生。」

善財聞已，歡喜踊躍，即詣彼園，周徧觀察，見其園中，有一大樹，名：過滿月，形如樓閣，高廣嚴好，放大光明，照一由旬；復見葉樹，名曰：普覆，其形如蓋，紺青光明，周徧照耀；復見華樹，名曰：華藏，形色高潔猶如雪山，雨眾妙華，如流香水，周徧普熏無有窮盡，猶忉利天歡喜園中，波利質多羅樹；復有果樹，名為：常熟，形如金山，味如甘露，柔軟香美，常放光明，種種眾果，悉皆具足；其中復有摩尼寶樹，名：毗盧遮那藏，其形無比，如妙高山，心王摩尼寶最在其上，阿僧祇色相摩尼寶周徧莊嚴，栴檀摩尼以為樹果，眾雜珠網羅覆其上；復有鬘樹，名為：天寶，恆出妙寶瓔珞華鬘，如意寶王，敷榮光耀，摩尼寶藏，蘊伏其下，以為樹根；復有衣樹，名：能清淨，常出眾色諸妙寶衣，垂布樹枝以為嚴飾；有音樂樹，名為：歡喜，其音美妙，過諸天樂；復有香樹，名：徧莊嚴，恆出妙香普熏一切。

園中復有種種陂池，一切皆以七寶莊嚴，其池八處，眾寶莊嚴；眾色摩尼而為欄楯，栴檀香末，凝積其中，上妙金沙彌布其底，八功德水清淨盈滿。優鉢羅華、波頭摩華、拘物頭華、芬陀利華徧覆其上；瞻博迦華、阿提目多迦華、婆利師迦華、曼陀羅華、摩訶曼陀羅華，如是等華，列植其岸，眾

鳥和鳴，其聲清雅。

種種天寶，妙莊嚴樹行列園中，諸寶樹下，各各敷置寶師子座，以不思議種種妙寶而為莊嚴。布以天衣，熏以妙香，垂諸寶繒，施諸寶帳，閤浮金網彌覆其上，寶鐸徐搖，出妙音聲。或有樹下，敷蓮華藏師子之座；或有樹下，敷香王摩尼藏師子之座；或有樹下，敷龍象莊嚴摩尼王藏師子之座；或有樹下，敷寶師子聚摩尼王藏師子之座；或有樹下，敷毗盧遮那摩尼王藏師子之座；或有樹下，敷十方毗盧遮那摩尼王藏師子之座；或有樹下，敷因陀羅摩尼金剛王藏師子之座；或有樹下，敷眾生形相毗盧遮那摩尼王藏師子之座；或有樹下，敷如意摩尼王藏師子之座；或有樹下，敷白色光明摩尼王藏師子之座；其一一座，各有百千寶師子座周帀圍繞，一一皆具無量莊嚴。

此大園中眾寶充滿，如海寶洲，寶衣布地敷設莊嚴，柔軟妙好；如迦鄰迦衣，能生樂觸，蹈之沒足，舉即還復；異類眾鳥，鳧鴈、鴛鴦、白鶴、孔雀、拘枳羅等，飛翔自在，顧影和鳴；寶梅檀林，列植門側，密葉翡翠，聳幹扶疎，布影垂陰莊嚴妙好；種種華樹常雨妙華，踰天帝釋雜華之園；無比香王普熏一切，香風四布，流及天人；一切樓閣眾寶莊嚴，上妙香華珍奇校飾，過天帝釋善法之堂；諸音樂樹奏天音樂，種種樂器，懸布樹枝，所謂：箏、笛、箜篌、琵琶、簫、

瑟如是等樂，不鼓自鳴，聞皆可意，離諸染著；寶多羅樹，覆寶鈴網，微風吹動出微妙音，如自在天善口天女；諸如意樹出眾寶衣，如天劫波服，垂布嚴飾有無量色，猶如大海；百千樓閣，眾寶莊嚴，如忉利天帝釋宮殿，寶蓋彌覆如妙高峰，如梵王宮光明普照。

爾時，善財童子，見此園林無量功德，種種莊嚴，皆是菩薩不思議業之所成就，出世善根之所生起，供養一切諸佛功德，廣修淨業無能壞者，一切世間無能與等。如是皆從師子鬘申比丘尼，了法如幻，不捨有為，積集廣大善業所成，不與聲聞、辟支佛共，異道邪論不能傾動，一切魔軍無能與敵，凡夫淺智不能思惟。三千大千世界天龍八部，無量眾生，隨自善根，如應度者，皆入此園而不迫窄。何以故？此比丘尼，不可思議威神力故。

爾時，善財見比丘尼，徧坐一切諸寶樹下大師子座，身相端嚴，威儀寂靜，住法平等，動止安庠；諸根調順，如大象王；心無垢濁如清淨池；普濟所求，如如意寶；不染世法，猶如蓮華；心無所畏，如師子王；護持淨戒不可傾動，如須彌山。能令見者心得清涼，如妙香山；能除眾生諸煩惱熱，如雪山中妙栴檀香；眾生見者諸苦銷滅，如妙見藥王；能令見者所願不空，如婆樓那天。永離欲染，如大梵王；淨眾生心，如水清寶；能長眾善，如良沃田；三業自在，猶如如來。

在一一座眾會不同，所說法門亦各差別。

或見處座，淨居天眾所共圍繞，摩醯首羅天王而為上首，此比丘尼為說法門，名：無盡法相解脫；或見處座，諸梵天眾所共圍繞，妙光明梵王而為上首，此比丘尼為說法門，名：普門差別清淨言音輪；或見處座，他化自在天天子、天女，所共圍繞，自在轉天王而為上首，此比丘尼為說法門，名：菩薩清淨心自在莊嚴；或見處座，妙變化天天子、天女所共圍繞，樂變化天王而為上首，此比丘尼為說法門，名：妙法清淨莊嚴門；或見處座，兜率陀天天子、天女所共圍繞，兜率天王而為上首，此比丘尼為說法門，名：自心藏旋轉；或見處座，須夜摩天天子、天女所共圍繞，須夜摩天王而為上首，此比丘尼為說法門，名：普徧莊嚴；或見處座，三十三天天子、天女所共圍繞，釋提桓因而為上首，此比丘尼為說法門，名染離門；

或見處座，百光明龍王、難陀龍王、優波難陀龍王、摩那斯龍王、伊羅跋陀龍王、阿那婆達多龍王等，龍子龍女所共圍繞，娑伽羅龍王而為上首，此比丘尼為說法門，名：佛境界光明莊嚴；或見處座，諸夜叉眾，童男童女所共圍繞，毗沙門天王而為上首，此比丘尼為說法門，名：救護眾生藏；或見處座，乾闥婆眾男女眷屬所共圍繞，持國乾闥婆王而為上首，此比丘尼為說法門，名：雨無盡大歡喜法雨；或見處座

，阿修羅眾男女眷屬所共圍繞，羅睺阿修羅王而為上首，此比丘尼為說法門，名：速疾莊嚴法界智門；或見處座，迦樓羅眾男女眷屬所共圍繞，大力勇持迦樓羅王而為上首，此比丘尼為說法門，名：怖動諸有海；或見處座，緊那羅眾男女眷屬所共圍繞，大樹緊那羅王而為上首，此比丘尼為說法門，名：佛行光明門；或見處座，摩睺羅伽眾男女眷屬所共圍繞，菴羅林忿怒摩睺羅伽王而為上首，此比丘尼為說法門，名：出生見佛歡喜心；或見處座，無數百千男子女人，童男童女所共圍繞，此比丘尼為說法門，名：殊勝行；或見處座，諸羅剎眾男女眷屬所共圍繞，常吸精氣大樹羅剎王而為上首，此比丘尼為說法門，名：發生慈悲心；

或見處座，信樂聲聞乘眾生所共圍繞，此比丘尼為說法門，名：勝智威力大光明；或見處座，信樂獨覺乘眾生所共圍繞，此比丘尼為說法門，名：佛功德廣大光明；或見處座，信樂大乘眾生所共圍繞，此比丘尼為說法門，名：普門三昧智光明；

或見處座，初地菩薩所共圍繞，此比丘尼為說法門，名：一切諸佛大願聚三昧；或見處座，二地菩薩所共圍繞，此比丘尼為說法門，名：無垢輪三昧；或見處座，三地菩薩所共圍繞，此比丘尼為說法門，名：大寂靜莊嚴三昧；或見處座，四地菩薩所共圍繞，此比丘尼為說法門，名：速疾出生一切

智境界三昧；或見處座，五地菩薩所共圍繞，此比丘尼為說法門，名：妙華藏三昧；或見處座，六地菩薩所共圍繞，此比丘尼為說法門，名：毗盧遮那藏三昧；或見處座，七地菩薩所共圍繞，此比丘尼為說法門，名：普徧莊嚴地三昧；或見處座，八地菩薩所共圍繞，此比丘尼為說法門，名：普徧法界境界化現身三昧；或見處座，九地菩薩所共圍繞，此比丘尼為說法門，名：無所得力智莊嚴三昧；或見處座，十地菩薩所共圍繞，此比丘尼為說法門，名：無障礙輪三昧；或見處座，執金剛菩薩所共圍繞，此比丘尼為說法門，名：金剛智那羅延莊嚴三昧。

爾時，善財童子，見如是等一切大眾，種種出生、種種住處、種種身相、種種眷屬，已成熟者、已調伏者，堪為法器，皆入此園，各於樹下，圍繞而坐，師子鬻申比丘尼，如其所應種種心性、種種欲樂、種種信解，隨彼所宜，勝劣差別，而為演說相應法門，令於阿耨多羅三藐三菩提得不退轉。

何以故？此比丘尼得：普眼捨得般若波羅蜜門、演說一切佛法般若波羅蜜門、法界差別際般若波羅蜜門、散壞一切障礙輪般若波羅蜜門、生長一切眾生善心般若波羅蜜門、最勝莊嚴般若波羅蜜門、無礙真實藏般若波羅蜜門、法界圓滿般若波羅蜜門、清淨心藏般若波羅蜜門、普徧出生種種語言神通藏般若波羅蜜門。此十般若波羅蜜門而為上首，入如是等無

數百萬阿僧祇般若波羅蜜門。此日光園中，一切菩薩及諸眾生，所見境界，所聞妙法，各各差別，悟解不同，皆是師子鬻申比丘尼，初勸發心，說法教化，令於阿耨多羅三藐三菩提得不退轉。

時，善財童子，見師子鬻申比丘尼，如是園林、如是牀座、如是經行、如是眾會、如是威儀、如是自在、如是普身、如是無畏、如是神力、如是辯才、如是莊嚴，復聞如是不可思議廣大法門，身心柔軟，五體投地，恭敬頂禮。合掌念言：「我當右繞此比丘尼，經於無數百千萬市。」作是念時，此比丘尼即放光明徧照其園，普及眾會。善財童子，即自見身徧一切處，一一座上比丘尼所，皆悉右繞百千萬市，圍繞畢已，合掌而立。白言：「聖者！我已先發阿耨多羅三藐三菩提心，而未知菩薩云何學菩薩行、云何修菩薩道，我聞聖者，善能誘誨，願為我說。」

比丘尼言：「善男子！我得菩薩解脫，名：滅除一切微細分別門。」善財白言：「聖者！何故名為滅除一切微細分別？」比丘尼言：「善男子！此解脫門，於一念中普照三世一切諸法，顯示本性智慧光明。」善財白言：「聖者！此智光明，境界云何？」

比丘尼言：「善男子！我入此智光明門時，得自在出生一切

法三昧王。以得如是三昧王故，現意生身，普徧十方一切世界兜率天宮，一生所繫諸菩薩所。於一一菩薩前，現不可說佛剎極微數身；於一一身，作不可說佛剎極微數最勝供養。所謂：或現天王身、龍王身、夜叉王身，乃至人王身，各各執持種種華雲、種種鬘雲、燒香、塗香，及以末香，衣服、瓔珞、幢旛、繒蓋、寶網、寶帳、寶藏、寶燈，乃至一切莊嚴具雲，我皆執持而以供養。如於住兜率宮，一生所繫菩薩所，親近承事，種種供養，如是降神入胎，住胎出胎，在家出家，往詣道場，成等正覺，轉正法輪，入於涅槃。如是中間，或住天宮，或住龍宮，乃至或住人、非人宮，於彼一切諸如來所，我皆如是而為供養。若有眾生，知我如是見聞、親近、供養佛者，一切皆於阿耨多羅三藐三菩提得不退轉；若有眾生，來詣我所，我皆誘誨，為其宣說般若波羅蜜門。

善男子！我見一切眾生，不分別眾生相，智眼明見故；聽一切語言，不分別語言相，心無所著故；見一切如來，不分別如來相，智了法身故；住持一切如來法輪，不分別法輪相，悟法自性故；一念徧知一切法，不分別諸法相，知法如幻故。

善男子！我唯知此，滅除一切微細分別，成就一切智菩薩解脫門，如諸菩薩摩訶薩，心無分別，普知諸法，一身端坐，充滿法界，於自身中，示現攝持一切佛剎，悉能往詣一切佛

所，於自身內，普現一切諸佛神力，一毛徧舉不可說不可說諸佛世界。於其自身一毛孔中，現不可說不可說世界成壞；於一念中，與不可說不可說眾生同住；於一念中，入不可說不可說一切諸劫。而我云何能知、能說彼功德行？善男子！於此南方有一聚落，名為：險難，其中有城，名：寶莊嚴，彼有女人，名：伐蘇蜜多。汝詣彼問，菩薩云何學菩薩行、修菩薩道。」時，善財童子，頂禮其足，繞無數帀，殷勤瞻仰，辭退而去。

爾時，善財童子，大慧光明，照啟其心，思惟觀察一切智智，一心隨順諸法實性堅固，了知一切眾生言音陀羅尼門，得受持一切如來法輪陀羅尼門，得與一切眾生作所歸依大悲力，得觀察一切法義理光明門，得速疾圓滿法界輪，得轉彼清淨大願輪，得普照十方一切法智光明，得徧莊嚴一切世界自在力，得普攝取一切菩薩神通智，得普發起一切菩薩圓滿願。漸漸前行，至險難國寶莊嚴城，處處尋訪伐蘇蜜多女。

城中有人，不知此女功德智慧，方便善巧，所住境界微密甚深，作如是念：「今此童子，諸根寂靜，諸根調順，智慧明了，已離放逸，心不迷亂，諦視一尋，無有疲懈，無所取著，目視不瞬，心無所動，甚深寬廣，猶如大海，不應於此伐蘇蜜多女，有貪愛心、有顛倒心，生於淨想，生於欲想，不應為此女色所攝。此童子者，不行魔行，不入魔境，不沒欲

泥，不被魔縛，不應作處，已能不作，有何等意而求此女？」其中有人，先知此女有勝功德，具深智慧，告善財言：「善哉！善哉！善男子！汝今乃能推求尋覓伐蘇蜜多女，汝已獲得廣大善利。善男子！汝應決定求佛妙果，決定欲為一切眾生作所依怙；決定欲拔一切眾生貪愛毒箭；決定欲破一切眾生，於女色中，所有淨想；決定欲雨一切如來普徧法界大功德雨。善男子！伐蘇蜜多女，於此城內市廛之北，自宅中住。」

時，善財童子，聞是語已，歡喜踊躍，心願圓滿，一心正念，往詣其門。見其住宅，廣博嚴麗，寶牆寶樹，及以寶壑，一一皆有十重圍繞；其寶壑中，香水盈滿，底布金沙，諸天寶華、優鉢羅華、波頭摩華、拘物頭華、芬陀利華，徧覆水上，異香芬馥，悅暢眾心，妙寶殊珍，莊嚴其岸；階陛欄楯，眾寶合成，宮殿樓閣，處處分布，門闥窗牖，相望間列，咸施網鐸，悉建幢旛，無量珍奇以為嚴飾；瑠璃為地，眾寶間錯，燒諸沈水，塗以栴檀，懸眾寶鈴，風動成音，散諸天華，周徧其地；摩尼燈燭，光明普照，諸珍寶藏，其數百千，十大園林，以為莊嚴；寶樹枝條，騰芳發曜；種種殊麗，不可稱說。

爾時善財，見此女人，顏貌端嚴，色相圓滿，皮膚金色，目髮紺青，不長不短，不粗不細，欲界人天，無能與比；音聲

美妙，超諸梵世，一切眾生，差別言音，悉皆具足，無不解了；深達字義，善巧談說，得如幻智，入方便門；眾寶瓔珞，莊嚴其身，一切寶網，周覆其上；首冠如意摩尼寶冠，無量眷屬，恭敬圍繞，皆共善根，同一行願，福德大藏，具足無盡。

時，彼女人，從其身出廣大光明，普照宅中一切堂宇，及寶宮殿，遇斯光者，身得清涼，心除惑熱。爾時，善財前詣其所，頂禮其足，合掌而立。白言：「聖者！我已先發阿耨多羅三藐三菩提心，而未知菩薩云何學菩薩行、云何修菩薩道，我聞聖者，善能誘誨，願為我說。」

彼即告言：「善男子！我得菩薩解脫，名：離貪欲際，我能隨順一切眾生諸所樂欲而為現身。若天見我，我為天女，形貌光明殊勝無比；如是乃至人、非人等而見我者，我即為現人、非人女，隨其形相，各各殊勝，隨其樂欲皆令得見。

善男子！若有眾生，欲意所纏，來詣我所，而於我身，生極愛染，心如昏醉，我為說法，彼聞法已，則離貪欲，得菩薩無著境界三昧；若有眾生，暫見於我，則離貪欲，得菩薩歡喜三昧；若有眾生，暫與我語，則離貪欲，得菩薩無礙妙音聲藏三昧；若有眾生，暫執我手，則離貪欲，得菩薩隨順徧往一切佛剎三昧；若有眾生暫昇我座，則離貪欲，得菩薩離

一切世間光明三昧；若有眾生，暫觀於我，則離貪欲，得菩薩寂靜莊嚴三昧；若有眾生，見我鬢申，則離貪欲，得菩薩摧伏一切外道三昧；若有眾生，見我目瞬，則離貪欲，得菩薩住佛境界光明三昧；若有眾生，抱持於我，則離貪欲，得菩薩攝一切眾生恆不捨離三昧；若有眾生，啖我脣吻，則離貪欲，得菩薩增長一切眾生福德藏三昧。如是一切所有眾生，來詣我所，親近於我，一切皆得住離貪際，入於菩薩一切智地最勝解脫。」

爾時，善財童子，白伐蘇蜜多女言：「聖者！云何此解脫門得名：最勝？」時女告言：「善男子！一切菩薩發阿耨多羅三藐三菩提心，由為女人不得速成無上佛道，亦不疾得辟支佛乘、阿羅漢果；五通仙人，由女色故，退失神通，為荷負者，天、阿修羅，常興戰伐；十頭羅剎，焚燒南海楞伽大城；或有諸王，喪失國土，乃至兄弟，自相殺害，造惡趣因，現世貧窮，甘為奴僕，不順師長，違背君親，如是一切皆由女人。我觀無數百千世界貪欲眾生，生死曠野，輪轉無窮，苦業之中，女為上首。是故菩薩，若離女色，即得親近諸善知識，復令眾生，因此離欲，皆住最勝解脫法門。」

善財童子白言：「聖者！種何善根、修何福業，而得增長如是種種殊勝功德？」時，女答言：「善男子！我念過去，有佛出世，名為：高行如來、應供、正徧知、明行足、善逝、

世間解、無上士、調御丈夫、天人師、佛、世尊。時，王都城，名曰：妙門。善男子！時，彼如來，為欲利樂諸眾生故，來入王城，蹈彼門闥。其城一切六種震動，忽然廣博，眾寶莊嚴，無量光明，遞相暎徹，種種寶華散布其地，諸天音樂同時俱奏，一切諸天，充滿虛空，恭敬禮拜，尊重讚歎。善男子！我於彼時，為長者妻，名曰：妙智，見佛神通，心生覺悟，則與其夫，疾詣佛所，發廣大心，以一寶錢，奉施於佛。是時，文殊師利童子，為佛侍者，為我說法，令發阿耨多羅三藐三菩提心。

善男子！我唯知此菩薩離貪欲際解脫法門，如諸菩薩摩訶薩，成就無邊巧方便智，福德廣大猶如虛空。而我云何能知、能說彼功德行？善男子！南方有城，名：淨達彼岸，中有居士，名：毗瑟底羅，彼常供養栴檀座佛塔。汝詣彼問，菩薩云何學菩薩行、修菩薩道。」時，善財童子頂禮其足，繞無數匝，殷勤瞻仰，辭退而去。

大方廣佛華嚴經普賢行願品卷第十五

離婆離婆帝 求訶求訶帝 陀羅尼帝 尼訶囉帝
毗黎你帝 摩訶伽帝 真陵乾帝 娑婆訶（七遍）

南無喝囉怛那 哆囉夜耶 佉囉佉囉
俱住俱住 摩囉摩囉 虎囉 吽 賀賀
蘇怛拏 吽 潑抹拏 娑婆訶 (三遍)

願以此功德 莊嚴佛淨土 上報四聖恩 下濟六凡苦
所有法界眾 悉修菩提行 盡此一報身 同生極樂國